

太上一乘海空智藏經卷之四

月四

太上一乘海空智度經卷之四

月四

普說品

爾時天尊告海空智藏言善男子我於往昔
過去劫時遊於光明七寶華林與大聖眾无
量无边諸天童子威光童子月光童子普光
童子寶明童子寶相童子寶嚴童子空藏童
子空念童子空印童子止心童子正定童子
正說童子正慈童子正施童子龍威童子龍
智童子龍華童子龍德童子如是等眾无量
无边以為眷屬而為說法

爾時復有淨相真人淨戒真人淨明真人法
王真人光明真人妙通真人妙思真人妙慧
真人妙行真人普達真人普納真人淨香真
人淨花真人左玄真人右玄真人如斯等輩
无量无边以爲眷屬而爲說法

月四

爾時復有大慧仙人大梵仙人遵法仙人弘
施仙人常護仙人妙行仙人妙相仙人妙嚴
仙人妙思仙人憐愍仙人飛天仙人智光仙
人如是等衆无量无边以爲眷屬而爲說法
爾時復有无量地仙供養百億妙道地仙受

持依止正法地仙如是等輩元量无边以為眷屬而為說法

爾時復有諸天道士上相道士惠上道士辯才道士勤誦道士信行道士持戒道士持香道士說法道士如是等輩以為眷屬而為說

法

爾時復有國中大王小王及長者善男善女悉來詣座而為說法善男子我今作是甚深正法轉大法輪讚揚道本宣傳顯說大慈法雨汝等四眾當竭身命稽首恭敬一心受持

請求加護過去未來及得見在一切眷屬於
是四衆一心頂禮无上天尊信心真實常住
道果瞻仰讚歎不可思議爾時

天尊以大慈故徧身光明普照十方和合音
聲唱說善言振動國土聲如雷音如師子吼

月四

二

顯照无边慈悲降世普潤一切无量衆生是
人非人俱蒙利益於是四衆各起作禮稽首
讚歎微妙功德現種種相非世久聞大衆天
尊誘善趣門顯揚祕要海空寶藏祕密法雨
灑於十方光明之相巍巍堂堂如日初出如

星中月徧照十方國土不可思議爾時

天尊歡喜答言善哉善哉善哉善男子汝等眷屬
一心諦聽普行无上正真法藏得見一乘海
空智藏以求極果證於法身不去不來汝今
眷屬作是思惟以歸上道得離生死千毒海
水不可思議爾時

天尊大悲薰心以偈頌曰

海空无邊際

形應亦難言

真性體常住

演說常无常

我今啓龍盲

歸命大哀尊

海空智藏故

善逝世間門

能作无上藥

普施窮乏鬼

智慧方便力

人天悉弘存

无上正法說

受記傳子孫

一乘深奧典

仙道共說論

无形亦无影

能作福田根

一心思惟想

終成真果園

真人童子等

宣通正法門

降伏諸異道

成就人仙童

月四

三

三業常恭敬

頂禮慈聖師

三世大道主

依導隨分解

唯願加攝受

通達永无礙

爾時象中大慧童子聞說偈已一心恭敬又

手作禮白天尊言大哀仁者久遠莊嚴微妙

七寶光明徧照其身善解法性不斷不常讚

歎道寶功德無雙讚歎法寶最爲無量功德
高妙又讚師寶善能開導一切衆生利益無
礙巧誘天人天中之人爲世良醫深達智慧
善設方便一切衆生輪迴供養得獲大利豈
當常久仙度諸天我今眷屬無量大慶值遇
希有以是因緣說偈讚曰

大智開盲闇

一切人非人

由如慧日光

分別於假真

普達平等覺

心或滅無餘

常住德圓智

隨行大慈仁

苦惱衆生性

極解登四民

遊化十方界

說法令心遵

本身依道惠 不犯衆生神 曉了无上智
不住生死隣 常起大慈故 不入於惡塵
徧設方便門 自至於法真 我以身口意
頂禮无上仁

爾時天尊以大悲心告大慧言善男子如是
如是如汝所說汝今眷屬從於往昔无量劫
時汝得智力善能解了真實醫王善男子譬
如香氣盡除諸塵如是香氣非從外來非從
種生以是因緣是名習氣善男子譬如金剛
心无礙故能除諸惑何以故念道真故了除

邪惑由如香氣汝等當知三世天尊出現妙
相放大光明照於十方无量世界一切衆生
不能見聞善男子譬如愚人生便无目雖有
光明終不覩見不善法人亦復如是善男子
一切衆生没生死海戀著色欲恩愛之情如

月四

四

是因緣是煩惱城出處顛倒覆蓋其身罪彌
无盡合煩惱根我於今日普爲演說一乘法
藏令其生解斷煩惱染善男子譬如有人得
此妙法傳與一切善男善女以是因緣如轉
輪王未降伏者能令降伏已降伏者力能守

護令不更動譬如妙法未破煩惱能令破壞
已破壞者能令不起利益一切諸衆生故說
三慧利是方便道令其煩惱永滅无餘於一
時中爲諸衆生以一道理爲諸衆生普演說
之欲令隨類一切衆生是人非人各得慧解
觀了諸仙猶如虛空一切萬物悉滿其中空
常一故善男子是諸神尊爲諸衆生亦復如
是是神尊者常在空寂亦无用心化身十方
現種種智說法教化利益平等无憎无愛无
貪无慾功德无量利益生死俱不能礙成就

隨順為諸衆生作一切智爾時

天尊而說偈言

善哉真實相 因果方便異 三學及果成

智慧无方志 十方諸國土 悉見童子侍

得入海空城 信益无邊治 此界无終始

月四

五

一切法依位 若有諸道士 及諸大通智

諸法依藏住 能作種子利 是名至道剛

我常為演說 執持曉麤細 種子恒隨流

愚凡我為說 勿執以為憂 獨自行无明

慈悲廣大慈 方便无差別 亦名无不伏

无我无相執 一期生无流 善惡无記中
我應永不息 離心汙不有 塵穢莫能食
无此一切處 不貧亦不富 得見真實義
惑障豈相茂 常行一乘道 名體獨不究
精思无退轉 是謂王中富

爾時方城王子勝因仙卿童子得聞天尊演
說甚深微妙正法善哉法樂哀憐讚歎无上
大師如是希有如七寶華紫金寶華希有希
有於是方城王子勝因仙卿童子說是事已
心開意解一乘海空空无空性空无我相常

樂自在微妙具足不可思議爾時

天尊以智慧眼即告勝因仙卿童子善男子
言智藏者譬如大海隨物所來其味常然雖
多種子之所依泊爾時水味不變不異是諸
雜物皆采依湊如是海水亦復不異善男子

一乘海空祕密智藏亦復如是住於十方世
界一切衆生隨來隨去如是寶藏亦復增減
善男子如色无色如是等界或是有覆或是
无覆說此二界煩惱終不能得善男子海空
智藏雖於生死煩惱城中心恒思惟一乘義

味為他講說敷演玄義身心清淨亦如无色
三運顛倒數數侵惱如是无色終不染著亦
復如是善男子海空出世有大利益種種功
德猶如虛空无可窮盡空无所有以是因緣
空无盡也

月四

六

爾時方城勝因童子稽首作禮瞻仰導前而
說偈曰

内外不明了

於二但假名

非真亦非實

為法種子成

念念滅俱有

隨逐至无名

決定觀因緣

亦如果中生

堅固不可薰

永離於色聲

究竟清淨法

演說為衆生

六識无不應

三途别不嬰

念念不俱有

了見海空城

内外此種子

三界无不榮

種子由相續

果熟甚充盈

譬如潤種子

甘露无不生

内外无薰習

豈有種子名

間等无薰習

果生非復生

已作未及作

得失入魔精

是我内外種

隨類起有情

一說名緣識

了受諸天迎

二說名受識

二趣道已傾

隨說入空藏

識者法亦平

達士以為田

已生亦未生

因果善知識

則離五魔城

隨化无窮極

非滅復非常

因果无差別

化導亦无方

无心應物通

受者永无殃

種子何方作

來去說无忘

若人若非人

受度豈无量

難滅復難解

演說令人弘

觀行人心異

法教亦不恒

月四

清淨人未滅

雲輿果已登

成就淨土國

得見道淨慧

種種願及見

普見物无驚

觀行人能成

隨彼意成故

所取唯有識

得道甚冥冥

色識色无識

若所識不寧

後識不得生

前識獨不行

无身住虛空

七

調伏无苦嬰

解脫邪魔縛

諸結不復生

爾時天尊得聞方城王子勝因仙卿童子作如是言善哉善哉善哉善男子汝是方城王子勝因童子決辯法要汝久積行功業圓滿是故稱之王子勝因汝於正論第一空義思惟海空祕密寶藏身心不動以是因緣汝名勝因善男子汝善醫方藥治有病一切衆生若人非人悉得利益以是因緣汝名勝因善男子汝作導師開一乘藏化諸衆生爲他演說海空智藏講誦思惟祕密義味深了通達作大

慈父利益衆生以是因緣汝名勝因爾時
天尊啓齒含笑五色光明從口中出徧滿十
方无量國土大地百種震動五苦咸解地獄
生蓮百蘇合香千清供水罪者受樂聞者光
明爾時

天尊復告真士大慧童子汝等已於第一義
中得證常樂不可思議海空智藏甚深功德
我今受汝化生天王大慧汝最不可思議善
能功德開發法相利益一切善哉大慧汝是
道子希有希有大慧童子真是醫王能活諸

子及醫諸病真良業田无荒无穢善男子大
慧汝已入淨香園得見一乘海空寶藏善男
子譬如有人得度江海不經惡風安穩彼岸
汝亦如是疾者得瘥寒者得衣饑者得食死
者還生父母兄弟妻子伯叔分別來久今忽
相見踴躍歡喜汝亦如是得法淨眼力能无
勝智慧无礙汝之通達第一空義海空寶藏
汝能利他自身无損大慧汝等因緣久遠非
是今日所可歎說爾時

天尊而說偈言

善哉海空上仙道

演說諸法得清淨

利益一切正行人

慈悲妙法令久住

喻如明燈日月光

亦如慧眼照衆生

依具三解得了了

通達无礙顯道明

无上天尊演正法

微妙海空智藏城

善哉真實應時敷

消除皮内心煩惱

如是聖言微妙法

能決妙理曉衆生

若亂心忘作是說

來往去來不覺知

善男善女咸恭敬

能顯真道无上師

隨順海空智藏城

演說无量善勝道

智照通真理无餘

分別我等自能了

志心叉手咸恭敬

是我自了法巨動

若違心法迷道教

若謗聖文失正法

如是行人迷失趣

生落三惡道中行

如衣受染淨非真

如花朝明久還悴

月四

九

冥冥地獄五苦道

饑餓悠悠窮鬼形

哭聲哀聲如雷電

若人非人共同驚

是我大慈啓彈指

三途五苦一時明

得見汝等前惡因

難勝逕願除罪嬰

如是三塗五苦人

一時得見智藏城

我說大乘一句義 常住三界爲法令

爾時天尊說此偈已即告方城勝因童子善男子如是經典難可思議是經法者爲醫諸子流通世間如紫光華希有希有如日光華月淨光華亦當希有甚可愛樂如是之華甚亦難見善男子汝等流通當來衆生若有一人持是經者一切大力鬼神王等守護其身令无增損何以故如是經者其威廣遠力勢強猛如獅子吼如雷震動由如金剛持此經者大力鬼王及天魔王悉見叉手一心恭敬

无復煩惱如是經典大哀天尊之所演說一
乘正教以是因緣利益一切何以故由信正
教能生正行所以者何能從正行能得正果
不可思議即得正法是故正法久得住世我
心憐愍无量无边一切衆生廣行濟拔无边
无限一切諸法爲此三量是真實義若善男
子汝不三量則非真實約於三印道法亦令
善男子一切有爲諸行无常一切有爲諸法
无我寂滅无爲普令一切是諸衆生得具正
行真无流惠導成正覺登无上道我於今日

略說偈言

從此及為此

為顯前因緣

信汝因說一

證无上智藏

若思了義論

得入真實觀

凡所生功德

降伏邪魔行

流灑於世界

月四

由此是所說

守自身方便

信法果說二

略說此三法

智藏信三寶

我故依本觀

回向禮三尊

救拔衆生苦

法界无限量

此流說四偈

是故說偈言

至大乘法中

是重說勝果

十

由是信二根

翻解攝大乘

供養諸道士

願此法无窮

真人行不住

能入真實觀

大慧釋了義

信智成二根

所備功德行

不生功德心

回向於三寶

由依智慧力

降伏諸外道

拔濟三塗苦

以此深句義

普化无差別

我今重宣述

流普施羣生

今諸一切子

皆獲无上利

爾時天尊說此偈已復告方城勝因童子善

男子汝等當修真地之法真人童子見一切

法得成道時不增不減如是之智是為自在

國土自在歸依自在所欲自在是自在者云

何自在善男子初自在者是道國土後自在

者一切衆生雜類國土何以故言道界者界
无所有无染无淨无道可增如是因緣故名
法地善男子我爲一切諸衆生故演說法相
願此羣生皆得成就无上道果故現淨土名
衆生土善男子若行此行得諸寶土具此自
在入真法地見海空智藏不生不死安樂无
爲若不修行真地法者憂悲苦惱諸患无常
是生是死煩惱切身善男子若有衆生心得
見了威德智慧能伏難伏能見難見能聞難
聞能修難修一切法相得見自在而无分別

為是義故无分无别具足功德爾時

天尊復說偈言

我說真地義

希有无上法

徧滿最勝理

恒流及无攝

无異无染淨

種種分別說

不增減種智

自在歸依義

自在業大利

修持光妙尊

空有无分有

由如世間性

爾時天尊說偈頌已復告方城勝因童子善

男子往昔過去我所未證出世經法令始得

證无量因緣有大慶悅恒相續生得行此經

思惟義味為諸衆生漸次成就善男子海空

智藏為諸衆生隨其根性我以法雨常雨能
除衆生煩惱焦熱能洗衆生三障垢塵生長
衆生一乘善根利益一切若人非人善男子
譬如甘雨潤於一切若山若澤若高若下是
諸草木无不蒙益善男子譬如稻穀能生芽
莖長生花果結實甘露施於四方一切衆生
无不飽足善男子我今演說作善因緣普令
一切諸衆生等生長一乘海空寶藏亦復如
是善男子當施是法為他演說一乘海空祕
密寶藏思惟義味講說空義令諸衆生若善

男子若善女人發回向心於三寶前頂禮尊
足起種種心發種種意窮諸所有一心恭敬
以妙寶花以妙寶香齋持供養發露懺悔善
男子作是思惟是大利益身得金剛永無動
轉住天中天常樂淨土得微妙果爾時

月四

十二

天尊復以偈曰

善哉善男子

方城法勝因

善巧請正法

自利及利他

我今為汝說

善思善受持

若善男子女

敬仰受持想

甘露徧空身

白日昇天堂

若男若女等

矯心生誹謗

生得赤病尸

死入无底獄

有行是經者

自淨如青蓮

由智及信心

頂禮真實義

注道普念師

得昇煩惱城

以是因緣故

觀法普皆空

智道是清淨

為世良福田

人聞智勝師

由如大良醫

醫治有病子

諸患皆悉除

方城勝童子

无上大慧師

海空智藏故

亦如化生王

是第一希有

汝等善男子

如化生大王

是因緣久遠

我故如是法

行善投於中

廣大如空地

成就世間王

清淨微妙果

汝等善男子

汝為世間師

至心應頂禮

求至常道果

聖道弟子眾

眾作世間依

為作世間藥

總治邪慢人

退悲舍脩道

長淪三途中

萬劫悔无益

汝說有所利

正理非所證

真人童子等

依止日光明

照了諸法相

月四

十三

无動及出世

我為等宣說

正法真實義

亦如淨日月

甚深了種種

是我依經典

能令聰慧入

下心起尊敬

細密難通法

善知无礙著

利於八世法

心常无染著

无礙名稱說

通愍恒受持

人天普識知

頂禮大師足

辯說常无常

興雨甘露藥

依止隨分解

猶如毛羽鳥

披閱決定城

以擇攝大乘

願此言利益

流布苦海人

法人及法義

性略及廣名

不淨淨究竟

故稱无等王

通達法界善

得生大道常

由緣極通法

人法二无忘

由无分別知

從无倒智生

由如道廣說

所安立法良

正明脩慧體

二智寂靖鄉

由如无量數

百千萬劫殃

依數恒脩習

今所得轉王

若能善脩道

一念悉皆長

猶如梵天人

侍從天尊力

普現種種門

得種常无量

在道方便中

通達永无相

名義互為客

真人應習常

二觀恒思量

登彼亦无弘

從此生實智

得離於塵增

若見諸非有

得入於无崩

真人常清淨

不悅亦不榮

捨離外塵相

得入智藏城

入所取非有

次第方便生

利益无有礙

爾時天尊說此偈已語勝因言善男子若有

衆生觀諸法空一切空性空性无我亦无世

界亦无空空譬如衆生欲觀諸色前色已空

後色亦空是名空空須臾之間復无量煩惱
亦復如是善男子先修小道小道既空次修
中道中道既空次修上道上道既空以是因
緣是名空空以是空故常樂无爲善男子譬
如金師冶鍊真金先除麤垢次除微塵後得
名爲百鍊真金善男子冶鍊身心求无上道
亦復如是善男子說名方便由此无定以无
定故真人童子隨欲成就微妙道法緣境如
意能得久住善男子未得令得已得令滿已
滿不退見在當來所有受生及行如是處多

得利益善男子一切衆生及行如是具足功
德天尊出世得聞正法名勝生處此由定故
真人童子於勝生處得取住捨隨意運用无
退无轉聲徧二乘一切衆生若人非人同心
瞻仰真人童子最勝生處必得自在微妙國
土化於他土无去无來无生无滅自在无礙
捨生欲生生已稱住善男子隨住久近捨生
捨滅隨其生生欲生欲滅隨引分別能令无
礙神通力故善男子一切衆生无邊世界住
煩惱城各求生生貪慾愛色以是因緣生滅

滅生常生常滅輪轉生死吾當愛故故現无
礙真人本願力无分別神通如意為諸衆生
說大法要普令衆生未見未聞令得見聞於
是天尊以大慈悲即便斂容觀察機緣各隨
其感則放光明照於十方國土世界令諸有

月四

十五

緣一切衆生成就其心安穩聽法故放光明
照於囚徒餓鬼地獄若親非親悉皆瞻見一
切衆生悉從光明得見十方九幽地獄復見
天尊演說法音聲徧虛空作諸天人化度衆
生隨其機感普現威神光明天尊坐寶蓮花

種種光明而為說法為度衆生由如大惠徧
无量界現種種身度一切苦是諸衆生悉皆
隨意聽受正法微妙一乘海空智藏功德魏
魏不可思議善男子威神之力隨識轉變迅
若電光往還速疾无可比類若有一人得觀
真境寂靜无為於一念間發无上道心更不
退一切罪垢悉得盡除善惡之業皆由於心
由心既空心識亦空心識既空轉變亦空以
是因緣心識速變過於疾風難見難聞此由
心識所為之處隨念即成如此心者觀无有

我乃能包含善男子由如鏡像大小俱照无不觀見我心觀見亦復如是一切之有甚多甚多皆現身中善男子迷惑衆生守迷不返牢著妄說我即觀機如金剛護令知宿命因來因緣或生饑饉世有疾病有疾醫治亦如

真人所受安樂普令一切諸衆生故平等皆令善男子若有信心於善无厭但爲求法无所愛惜我當助勸爲說一乘海空寶藏消除衆生煩惱火城如火熾盛難當无敵若有衆生求欲圓滿心无疲倦除惡進善一心受持

於惡知止於善无厭法相如是我當為說善
男子汝今眷屬應當一心發大乘智離有離
无以是因緣有无空淨是滅本識亦空本識
空故法相續生善男子若有衆生能如是者
即破諸惑所以者何大哀天尊隨於衆生一

月四

十六

切根性及煩惱性為在種種微妙法相若人
非人若有一人執心空見空法不離疑惑正
法於中現世空无所得若觀此法說同一真
亦如一味現世得安成就道果爾時

天尊復告方城王子勝因善男子汝於往昔

无量劫時修行一乘海空智藏以是因緣乃
於今日得證一乘海空智藏微妙功德真是
醫王希有希有汝名勝因有善方術醫治諸
子解說善根以是因緣汝名勝因善男子汝
有廣願具足功德云何廣願一者常願願大
供養常以供養於彼勝福及法師說二者常
願願我是等一心受持勝妙正法三者常願
轉大法輪願於大衆常轉法輪四者常願心
修行願願常說法一切聖賢真人童子普得
聞見五者常願成就國土一切衆生當得安

穩三乘善根六者常願承事心願願大哀天
尊住於諸國見諸道士常恒恭敬聽受正法
七者常願得淨土國安立法教脩行護念一
切是諸衆生當得安穩八者常願不離一切
諸衆生等不離仙道真人童子同意勤行九

月四

十七

者常願利益一切普蒙蔭覆无有空過十者
常願了覺正道化諸衆生同得正果善男子
如是十種微妙上願能修之者至登勝地至
得成立何以故如此願者真是同得清淨國
土善男子我已得之清淨國土故出離於生

死穢土善男子亦如龍王十二緣生或生不生或不生生或生生或非生生或非不生各隨物宜而為演說善男子復有緣生有法名染无法名淨善男子汝今當知无上真事微妙正法說真說實云何而言說真戒者善男子是真戒者八素四明俱歸是一汝今眷屬皆應觀之是經深奧汝諦受持其中微妙細密之意一清淨戒即是性戒自性恒淨能持已犯已發露心還受清淨汝等次觀一信清淨二心清淨三身清淨發无上道身心清淨

始是明行衆行之宗得清淨故以大慈悲故
起衆行了見道法清淨无礙由實曉明微妙
之宗通達真理境智无差即名為道所以者
何達真道故道應化身當授學師善男子受
持正教修習正行如是之子名為无上第一

導師普令衆生得成熟之曉了道相種種念
願使諸衆生求覓真一自然道果使諸當來
一切衆生樂弘上道演說一乘海空智藏使
諸衆生起平等利希有希有心住功德堅固
自身離於五塵捨愛著心守護根性住无上

天常樂之地安穩不動善男子若有一人捨
愛著心守護六根不令作惡當令此人住四
念果於念通了甚深妙法不起疑謗心如蓮
華色中鮮明不著諸塵生愛念想若觀此色
空无所有猶如化生大王王子諸德清淨生
道國土有能摧伏以威德力求法出家身心
清淨離煩惱城登上方界親侍神尊深了諸
法空淨非有亦非有淨非不有淨何以故一
切衆生未得空解二觀有故未得微妙深定
慧力善男子汝今眷屬既得出家汝於所得

深妙法中起愛著心由愛著故不得清淨所以者何清淨正法无所有處若執諸法有他異相則起愛著善男子无有是處是愛著者无明想行作意名行行即是業真人童子正修六行觀於生死未能捨離无量功德由多修行厭離諸惡有爲生滅起厭離諸惡有爲生滅起厭惡想此想如空无有是處不能久住一一諸法皆有異義未能了知一切衆生言語不同所因各異善男子道以法門攝法品類无量无边或以五蔭以爲法門攝一切

法衆生根性如在掌中鈍根衆生不能深受
真人童子以善法力說此深法令其能受无
上正法說无量義善巧方便威德自在復以
无量微妙正法教於一切无量法門以是之
故无量无边名由句義亦復无量无边微妙

月四

十九

句義以成衆生无上巧言於不難法而生難
想立一切難令彼受屈而不可答若有答言
令彼得解海空道果以法爲身云何法身有
多種義所說一切三世諸法如有如无善男
子是方便門是大慧門若有衆生未有信者

以教一乘海空智藏寶而持之未種善根以
愛慈之堅固善根普得成就利益一切未成
就者令得成就未解脫者令得解脫故以方
便設於世間善男子猶如大慧增長功德能
利善力汝能善勸一切衆生甚多甚多勇猛
精進強求發願煩惱永滅滅不復生善男子
光嚴智勝汝亦希有法地國王亦名希有化
生大王亦名希有和合善根大慧衆生世間
希有海空智藏亦名希有善種大王亦名希
有於是天尊以大慈眼而說偈言

方城法勝因

以法有種種

故於天中天

无所有之法

善哉微妙法

觀色自性空

大空及小空

俱是无所有

本來非有法

衆生妄想故

如是於諸法

方城法勝因

一切衆生類

心分別所依

如空无空有

无作亦无得

不由如空空

是色空非色

則生无分別

无色无空法

故色即是空

若色與空異

空體則不成

云何成不成

譬如如有爲法

與常相不異

若能分別性

說此即是空

空則是色空

云何色空空

色相无所有

則是有是空

色空即是色

无有无分别

此空即是色

空色空空空

實性不可說

由如淨土生

非離色有空

故空不成色

色體如虛空

故名爲空空

若空與色異

緣色不同真

无有成聖義

月四

二十

空不能遣色

无離凡夫義

若與分別相

即生不淨品

若與真實相

即應成淨品

故不可說空

有色何爲色

唯有名是色

大哉善男子

若離名空色

實无本性空

是自性无生

无滅无深淨

此色无所有

有生即有染

故色无别相

以无所有通

對假而立名

是虛假所作

對諸名分別

一切法本空

由假立容性

隨緣說諸法

如此一切名

真人了不見

不見亦不生

是名无等雙

以此說為因

无分亦无別

滅諸分別惑

名與法不異

一切諸有法

是色空非空

出則為種子

入則无性生

有此无相理

方地金剛眼

於名前无智

多名及不定

成義由同體

多雜體相異

以无相已有

无染而有淨

是故譬如空

以是空法空

无自无他性

真實性亦无

譬如鏡中像

所見无所有

善惡身業生

色以影隨形

如響相往來

譬如光影響

由如水中月

水中无所有

寂靜心亦爾

故說无有譬

由是无上道

善巧於世間

月四

二十一

善哉大聖師

分別說深隱

得悟一乘人

爾時大慧得聞天尊說此偈已即問方城勝

因童子大哀天尊慈悲法雨說此句義及說

法處善哉方城勝因童子大慈天尊云何義

故作如是言天尊處處經歷諸天云何不見

生死過去依他性中依真實性生死來往无
差別義輒欲諮問未敢有言善哉真人方城
勝因唯願仁者與諸大王往詣尊所請問疑
惑其意云何

爾時方城勝因童子答大慧言善哉法師我
常思惟微妙正法希願弘持今汝賜問唯在
上仁於是善哉相共馳往金光寶明信勝法
王天尊座所作禮恭敬白天尊言唯願天尊
哀愍答我

爾時大慧又復白言一切衆生有緣无緣從

何而來有常无常從何而來空有之相離常
非常文理相離不見色有為有色耶為无色
耶爾時

天尊歡喜答言善哉善哉善男子汝今所問
實无所問汝今所說實无所說汝今諦聽依
位而坐我當告子本昔因緣善男子於无常
處說非常法說非无常非常非非常依无相
義演說常道是名无常善男子依他性相由
真實性分數常住由分別性故性亦无常由
二性分非常非无常如是義說常无常无二

苦樂无二善惡无二空不空无二我无我无
二淨不淨无二性不性无二生不生无二滅
不滅无二何以故由於是等差別見故見常
无常見樂不樂見淨不淨見空不空見性不
性見苦不苦見滅不滅以是見故和同一見
以一見故見无所見亦无无見无見之見隨
於衆生說常无常決了二性寂滅來去爾時
天尊而說偈言

月四

二十二

橋梁善男子

大慧无上師

諸法實希有

如彼種種現

衆聖之所尊

由此法非法

无此法非法

无上善男子

是義无為法

故說无二義

依一分說言

或有或非有

於二故說言

非有非非有

顯現故不无

是故无說常

顯現實相故

是故說非无

由自體非有

自體不住故

常取不有法

三性成无住

田无性故成

前為後依止

无生滅本淨

及自性滅度

一心如青蓮

願得真金花

无為七寶光

常住法王所

不入退法輪

願生難勝地

永保无為生

皆成无上道

爾時方城勝因童子得聞天尊說此偈已謂
大慧言大哀天尊以大慈悲成就一乘海空
智藏无量義味假於言說令悟衆生我今思
惟希有希有天尊善能說諸法相非有非非
有非无非非无非說非非說因緣和合開方

月四

二十三

便門示導衆生以是因緣不可思議至道虛
无无所得故譬如楔用用聲止聲何以故譬
如為病因病服藥調養身心病瘥藥消空无
所有

爾時大慧復謂言曰大慈天尊說諸法相不

空不有不常不滅今我等輩知空有耶不知
之耶譬如有人執平等法演說彼此空无有
處天尊亦爾平等法身安置心中故說如是
譬如有人說昔是今天尊成就平等爲意譬
如有人有一金錢以此金錢營覓得千非不
得千非非一得天尊亦爾如一金錢得千萬
錢如是之相譬如有人誦持經典所得功德
百千萬劫以是一切功德千萬亦復如是得
一金錢用千萬錢亦復如是若有男女求道
亦爾能行小善而有勝報由誰發願於安樂

道國土清淨往詣受生具十想念成就其心
若有衆生成就天尊先爲讚歎布施功德若
其有人或爲財寶毀此財寶有慳恡心不依
道惠設善方便令諸一切萬物衆生不違道
教亦復如是

爾時方城勝因童子而於尊前作禮叉手說
偈頌曰

天尊大哀母

善說无上義

言薰習所生

一切有諸法

如是果報成

若人若非人

受道自然生

故說梵尊師

疾成海空兵

從有相有見

應知法入明

依他中分別

非无真實情

故不得此藥

我法普等平

奉道住功德

善有衆義榮

俱發智慧道

咸登太上京

爾時方城勝因童子說此偈已謂海空言大

月四

三十四

哉真士因緣久遠身有光明自在神通出於
世間德行圓滿不可歎說衆生染溺以何根
性作如是難入以不入出以不出愛著兩邊
其事云何

爾時海空智藏答勝因言大士仁者入无有

二見法平等非一非非一以茲諸法无有是處何以故破諸魔邪降伏一切邪心外道於是功德世間无有天魔外道說於正理天尊所說微妙正法安立自法亦无有定何以故大哀天尊所說本性无上正道所說正法不可轉變不可破壞何以故智慧圓滿一切天魔異見外道邪心執著障於大法起見有心破於大法以是因緣盛光童子現種種身而為說法度脫衆生顯現功德謂以无我故顯現清淨微妙功德我无有量方便功德如世

間法上界為勝善男子我說法教謂窮生死
能生一切衆生善根利益安樂无礙功德大
哀天尊住以法界无為勝法善男子法界有
一一者染界二者无染界无染界者清淨最
勝何以故大哀天尊窮生死際利益安樂功

月四

二十五

樂无盡爾時海空而說偈言

能持大愛法

隨順於善根

非自亦非他

有益有增損

天尊於何處

說此諸法相

此界无始時

一切法依止

若有諸道上

及有得滅度

如是本非本

希有亦希有

爾時海空說此偈已復問方城勝因童子說
言道士一切衆生初不了達无明爲盡貪愛
所縛或隨流接有時畜生有時鬼道有時人
道有時天尊有時天真諸道士等雖得出家
顛倒邪見不覺不知於世間中如是受苦增
長貪愛恒受罪譴是諸道士何因緣故不覺
不知

爾時勝因童子答海空言善哉真士是諸道
士雖得出家愛諸執著姦詐熾盛多畜姦盜
而言出家希求名利欲入供養善男子如是

因緣恒受罪謫何以故出家在家善男子如是之人恒受罪謫天尊說言作如是意善男子有德道士无所愛著求於勝法觀一切法无常境界空无所有如是出家與善因緣善惡因緣各隨所趣不關他人善男子天尊說言此識誠者依持是處恒不捨離无有是是何以故空空法故恒河上沙諸是功德亦无有著善男子若真人藏有了不了无有處處大哀天尊祕密寶藏非非有无亦非有无无有是處善出家者依止是處非出家人著識

多行姦詐妄語歸惡趣門自著自縛不問外
集苦哉歎言一切衆生皆悉如是勝因童子
語大真士海空智藏作如是事答曰不也真
士大師因緣廣遠今日欣勇无上大師无量
眷屬汝能發念无上道心不可思議

月四

二十六

爾時勝因童子於大衆中仍說偈曰

諸法依藏住 一切衆生識 故名可利耶

我爲人演說 執持識深細 法種子恒流

於凡我不說 彼勿執爲我 如非一切行

一切行不知 真人於善識 則離除五識



若對治轉依

非滅故不成

果因无差別

於滅則有遇

无種子无法

若許為轉依

於无二无故

轉依義不成

无餘心轉法

以何方便作

而到海空藏

太上一乘海空智藏經卷之四

